



basic education

Department:
Basic Education
REPUBLIC OF SOUTH AFRICA

SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS

TSHIVENDA LUAMBO LWA HAYANI (HL)

BAMMBIRI LA VHUVHILI (P2)

2022

MARAGA: 80

TSHIFHINGA: Awara 2½

Bammbiri ili li na masiatari a 26.

NDAELA NA MAFHUNGOTHANGELI

1. Vhalani idzi ndaela nga vhuronwane phanda ha musi ni sa athu u thoma u fhindula mbudziso.
2. Ni songo vhuya na edzisa u vhala bammbiri lothe. Tolani thebulu ya zwi re ngomu kha siatari la 4 ni swaye nomboro dza mbudziso dzo vhudziswaho kha zwibveledzwa zwe na guda uno nwaha. Nga murahu ha izwo, vhalani mbudziso idzo ni nange dzine na tama u dzi fhindula.
3. Bammbiri heli li na khethekanyo THARU:

KHETHEKANYO YA A: Vhurendi	(30)
KHETHEKANYO YA B: Nganea KANA Foluku $\ddot{\text{o}}$ oo	(25)
KHETHEKANYO YA C: Dirama	(25)

4. Fhindulani mbudziso THANU dzo fhelela: THARU kha KHETHEKANYO YA A, NTHIHI kha KHETHEKANYO YA B na NTHIHI kha KHETHEKANYO YA C nga ndila i tevhelaho:

KHETHEKANYO YA A: VHURENDI

VHURENDI HO VHONWAHO – Fhindulani mbudziso MBILI.
VHURENDI VHU SONGO VHONWAHO – Mbudziso ya KHOMBEKHOMBE.

KHETHEKANYO YA B: NGANEA KANA FOLUKU $\ddot{\text{o}}$ OO

Fhindulani mbudziso NTHIHI.

KHETHEKANYO YA C: DIRAMA

Fhindulani mbudziso NTHIHI.

5. KUNANGELE KWA PHINDULO KHA KHETHEKANYO YA B (NGANEA/FOLUKU $\ddot{\text{o}}$ OO) NA YA C (DIRAMA):

- Fhindulani mbudziso FHEDZI dza kha nganea/foluku $\ddot{\text{o}}$ oo na kha dirama dze na guda.
- Fhindulani MBUDZISO NDAPFU NTHIHI na MBUDZISO PFUFHI NTHIHI. Arali na fhindula mbudziso ndapfu kha KHETHEKANYO YA B, ni fanela u fhindula mbudziso pfufhi kha KHETHEKANYO YA C. Arali na fhindula mbudziso pfufhi kha KHETHEKANYO YA B, ni fanela u fhindula mbudziso ndapfu kha KHETHEKANYO YA C. Shumisani mutevhe wa u sedzulusa uri u ni thuse.

6. VHULAPFU HA PHINDULO

- Mbudziso ndapfu ya Vhurendi i tea u fhindulwa nga maipfi a u bva kha a 250 u ya kha a 300.
 - Mbudziso ndapfu dza khethekanyo ya Nganea/Folukuloo na ya Dirama dzi tea u fhindulwa nga maipfi a u bva kha a 400 u ya kha a 450.
 - Vhulapfu ha phindulo dza mbudziso pfufhi vhu tea u langwa nga maraga dzo nekedzwaho/avhelwaho. Phindulo dza vhalingiwa dzi tea u pfufhifhadzwa dza dovha dza livhanywa.
7. Tevhedzani ndaela dzo nekedzwaho mathomoni a khethekanyo iñwe na iñwe nga vhuronwane.
8. Nomborani phindulo dzañu kokotolo maelana na mutevhe wa u nombora wo shumiswaho kha ili bammbiri la mbudziso.
9. Thomani khethekanyo INWE NA INWE kha siatari LISWA.
10. Ndangatshifhinga yo anganywaho:
- KHETHEKANYO YA A: I anganyelwa u swika kha minetse ya 40
KHETHEKANYO YA B: I anganyelwa u swika kha minetse ya 55
KHETHEKANYO YA C: I anganyelwa u swika kha minetse ya 55
11. Nwalani nga vhudele, nahone zwi vhaleaho.

THEBULU YA ZWI RE NGOMU

KHETHEKANYO YA A: VHURENDI

Vhurendi ho ranelwaho/vhonwaho: Fhindulani mbudziso MBILI DZINWE na DZINWE.

NOMBORO YA MBUDZISO	LUSHAKA LWA MBUDZISO	MARAGA	NOMBORO YA SIATARI
1. 'Xuxuxu'	Mbudziso ndapfu	10	6
2. 'Ntendele ndi vhe tsumbandila'	Mbudziso pfufhi	10	7
3. 'Mbilu i lilela u gavha'	Mbudziso pfufhi	10	8
4. 'Ndi dakalo-zwililo'	Mbudziso pfufhi	10	9

NA

Vhurendi vhu songo ranelwaho/vhonwaho: Mbudziso ya KHOMBEKHOMBE

5. 'Nwananga'	Mbudziso pfufhi	10	10
---------------	-----------------	----	----

***PFESESANI:** Fhindulani MBUDZISO NDAPFU NTHIHI na PFUFHI NTHIHI. Arali na fhindula mbudziso ndapfu kha KHETHEKANYO YA B, ni tea u fhindula MBUDZISO PFUFHI u bva kha KHETHEKANYO YA C. Kha KHETHEKANYO YA B na KHETHEKANYO YA C, fhindulani mbudziso nthihinthihi u bva kha KHETHEKANYO inwe na inwe.

KHETHEKANYO YA B: NGANEA/FOLUKULOO

NGANEA: Fhindulani mbudziso NTHIHI u bva kha NGANEA dzo ranelwaho.

6. Nandi ndi shenga?	Mbudziso ndapfu	25	12
7. Nandi ndi shenga?	Mbudziso pfufhi	25	12
8. Isha ja Mitodzi	Mbudziso ndapfu	25	15
9. Isha ja Mitodzi	Mbudziso pfufhi	25	15

KANA

FOLUKULOO: Fhindulani mbudziso NTHIHI u bva kha FOLUKULOO yo ranelwaho.

10. Khuvhanganyo ya folukuloo	Mbudziso ndapfu	25	17
11. Khuvhanganyo ya folukuloo	Mbudziso pfufhi	25	18

KHETHEKANYO YA C: DIRAMA

Fhindulani mbudziso NTHIHI fhedzi u bva kha dirama dzo ranelwaho.

12. U lema hu fhira u lotshelwa	Mbudziso ndapfu	25	21
13. U lema hu fhira u lotshelwa	Mbudziso pfufhi	25	21
14. Tshilwavhusiku	Mbudziso ndapfu	25	24
15. Tshilwavhusiku	Mbudziso pfufhi	25	24

***PFESESANI:** Kha KHETHEKANYO YA B na YA C, fhindulani MBUDZISO NDAPFU NTHIHI na MBUDZISO PFUFHI NTHIHI. A ni lavhelelwi u fhindula mbudziso MBILI ndapfu kana mbudziso MBILI pfufhi.

MUTEVHE WA U SEDZULUSA

Shumisani uyu mutesvhe wa u sedzulusa uri ni vhe na vhutanzi ha uri no fhindula tshivhalo tsho teaho tsha mbudziso nga u vhea luswayo ho teaho.

KHETHEKANYO	NOMBORO DZA MBUDZISO	TSHIVHALO TSHA MBUDZISO DZO TEAHO U FHINDULWA	LUSWAYO (✓)
A: VHURENDI (Vhurendi ho randelwaho/ vhonwaho)	1–4	2	
A: VHURENDI (Vhurendi vhu songo randelwaho/vhonwaho)	5	1	
B: NGANEA/FOLUKUŁOO (Mbudziso ndapfu kana Mbudziso pfufhi)	6–11	1	
C: DIRAMA (Mbudziso ndapfu kana Mbudziso pfufhi)	12–15	1	
*PFESESANI:	Kha KHETHEKANYO YA B na YA C, ni tea u vha na vhutanzi ha uri no fhindula mbudziso NDAPFU NTHIHI na PFUFHI NTHIHİ. A ni tei u fhindula mbudziso ndapfu MBILI kana mbudziso pfufhi MBILI.		

KHETHEKANYO YA A: VHURENDI**VHURENDI HO RANDELWAHO/VHONWAHO**

Fhindulani mbudziso MBILI dziwe na dziwe kha NNA dzo vhudziswaho.

MBUDZISO YA 1: VHURENDI – MBUDZISO NDAPFU

Vhalani tshirendo itshi nga vhuronwane ni kone u fhindula mbudziso i tevhelaho.

XUXUXU – AA Mphaga

- 1 Xuxuxu mudzunga na^{lo} phera dzoth^e,
 2 Mudzungaulisa zwe wa khuba,
 3 Dzhango a dadze a pembele,
 4 Xuxuxu tsha mbiluni u a kundwa,
 5 Mudzengamisa vhaiwe kha vhaiwe,
 6 Phanzi muswikele u do guda,
 7 Vha pfaho xuxuxu kha vha dzinge.
- 8 U khodwa lini awe madzanga o vhonwa?
 9 Limai xuxuxu, do!
 10 Thama-thama dza vha maswinaswina,
 11 Shumai xuxuxu, do!
 12 Mbevha na tshimange ndi mme na riwana,
 13 Sa mphogoli vhukati we phongo!
- 14 Ha tumbi fhasi xuxuxu u la o ima,
 15 Khali ya xuxuxu wela mulambo,
 16 Mbodzambodzana vha la,
 17 Khundavhalai kungela zwiambo,
 18 A pfa tshino o takutshedza,
 19 Tshino kha vha^{la} tshi^{la} tsha vhan^o,
 20 Tumulwa milenzhe xuxuxu zwi pfo!

Kha itshi tshirendo, murendi u bvisela khagala muhumbulo wawe o sedza kutshilele kwa xuxuxu zwi tshi kwama vhutshilo ha vhaiwe vhathu na ha ene mu^{ne}.

Nga maipfi a u bva kha a 250 u swika kha a 300, sengulusani ndila ine murendi a shumisa ngayo ndima/zwitanza u bvisela khagala theroy a tshirendo itshi.

[10]

MBUDZISO YA 2: VHURENDI – MBUDZISO PFUFHI

Vhalani tshirendo itshi nga vhuronwane uri ni do kona u fhindula mbudziso dici tevhelaho.

NTENDELE NDI VHE TSUMBANDILA – FR Modau

- | | |
|----|--|
| 1 | Ntendele ndi vhe tsumbandila |
| 2 | Sa unga nne ndi linzhakandila lo no vhonaho |
| 3 | Tombo li tshi mela midzi – tenda u vha mutshila! |
| 4 | Fulufhela nne ndo no ponyaho |
| 5 | Mililo yothe nda dzima zwa ya na vhusula |
| 6 | Dipfundise u ile zwa madzanga a zwi fheli |
| 7 | Ó vhalaho bugu u do hurana na ludzula. |
| 8 | Zwivhili two piringedzaho thondo ino zwi sa mwemweli |
| 9 | Zwiraru two i sikelaho vhida matyo yo pundisa |
| 10 | U konyolela matanda ndevheni tshivhangalala |
| 11 | Mphorosi muga sambitsolo u pulisa |
| 12 | U sa thonifha vhabebi na vhothe vhalala |
| 13 | Kha ndaño yo vhofhaho vhaswa vha murafho uno |
| 14 | Mvalo dzavho kha dici vha sengise lufuni luno. |

- | | | |
|-----|---|-----|
| 2.1 | Murendi u khou bvisela khagala zwifhio nga mitaladzi/vese ya 3? | |
| | 'Tombo li ... mutshila' | (2) |
| 2.2 | Tshirendo itshi ndi tsha lushaka-de? Tikedzani phindulo yanu. | (2) |
| 2.3 | Muhumbulo muhulwane une murendi a tama u u bvisela khagala nga itshi tshirendo ndi ufhio? | (2) |
| 2.4 | Thounu ya tshirendo itshi i dzumbulula hani vhudipfi ha murendi? | (2) |
| 2.5 | Ni a tendelana na na kuhumbulele kwa murendi ku wanalahlo kha mitaladzi/vese ya 8–12? | |
| | Tikedzani phindulo yanu. | (2) |
- [10]

MBUDZISO YA 3: VHURENDI – MBUDZISO PFUFHI

Vhalani tshirendo itsi nga vhuronwane uri ni \ddot{d} o kona u fhindula mbudziso dzi tevhelaho.

MBILU I LILELA U GAVHA – WMR Sigwavhulimu

- 1 Mbilu i \ddot{d} udemela i sa fhidzi,
 2 I lingedza \ddot{u} gavha madzanga a shango,
 3 Ya thenisa maya-vhuthu
 4 Nga u u nyalisa vhu \ddot{t} ungu-phat \ddot{h} o.

 5 Mbilu sa miri ya deme.
 6 I lwedzanaho u gavha tshilidzi tsha \ddot{d} uvha,
 7 Kha i vhanyuludze tserekanywa dza madzanga a shango
 8 I lilele u gavha Tshilidzi tshidzo ya maya.

 9 Mbilu yo pinikwa vhupulini ha \ddot{n} ama,
 10 I vhalavhala yo lianela \ddot{d} inzwini,
 11 Mbilu sa \ddot{d} ongololo yo \ddot{k} atana kha mudifho wa shango
 12 I \ddot{d} o kundwa u swikisa mulaedza wa tshidzo.

- 3.1 Ndi zwifhio zwine murendi a tama u zwi bvisela khagala nga mitaladzi/vese ya 1–2?
 'Mbilu ... shango' (2)
- 3.2 Tshirendo itsi ndi tsha lushaka- \ddot{d} e?
 Tikedzani phindulo ya \ddot{u} . (2)
- 3.3 Ndi ufhio muhumbulo muhulwane une murendi a \ddot{t} odou swikisa kha vhavhali nga tshirendo itsi? (2)
- 3.4 Thounu ya tshirendo itsi i dzumbulula hani vhudipfi ha murendi? (2)
- 3.5 Ni a tendelana na na kuvhonele kwa murendi ku re kha ndima/tshitanza tsha 3?
 Tikedzani phindulo ya \ddot{u} . (2)
 [10]

MBUDZISO YA 4: VHURENDI – MBUDZISO PFUFHI

Vhalani tshirendo itshi nga vhuronwane uri ni do kona u fhindula mbudziso dici tevhelaho.

NDI DAKALO-ZWILIGO – BR Mafhege

- 1 Lo tsha ndi nyavha-nyavha,
- 2 Vhutshilo ndi mupikisano,
- 3 Wa sa thanya u a redzemwa,
- 4 Vhatali hu hone vho tangana.

- 5 Vha amba vha sea vha vhandana,
- 6 Musi hu hone lo sina midzi,
- 7 Vhusiwana hu tshee ho ngalangala,
- 8 Hu hone o tsitsa vhana.

- 9 Ngelekanyo vho xedza,
- 10 Mathupho mbilaelo zwo livhalwa,
- 11 Mihumbulo la matshelo i siho,
- 12 Zwa mulovha zwo fhira.

- 13 Tshifhinga tshi tambiswa nga dakalo,
- 14 Ri diphina nga zwa zwino,
- 15 Ngauri zwino ndi zwa zwino,
- 16 La u tavhela u li ore.

- 17 Shango u hula ndi vhathe,
- 18 Maguhuhu u dala ndi ifa,
- 19 Zwe a vhulunga ndi dakalo-zwiligo,
- 20 Tshifi iwe muñe u tou dirembela.

- 21 Zwikhođo u dala nga madzanga,
- 22 Ro hangwa uri zwothe ndi mahandana,
- 23 Ngeno hu si tshinwe hu dakalo-zwiligo,
- 24 Ngeno Muñe wa lutshetshe o nea.

- 25 Ri lata Ene ra itela yashu mivhili,
- 26 Dakalo-dakalo lo thalangana,
- 27 Gundo lo dala vha dakalo zwiligo,
- 28 Fhedzi zwothe ndi mahandana.

4.1 Murendi u ḥoda u ri vhudza mini nga mutaladzi/vese ya 3?

'Wa sa ... redzemuwa,'

(2)

4.2 Tshirendo itshi ndi tsha lushaka-đe?

Tikedzani phindulo yanu.

(2)

4.3 Ndi ufhio mulaedza une murendi a ḥoda u u rumela kha vhavhali nga tshirendo itshi?

(2)

4.4 Thounu ya tshirendo itshi i dzumbulula hani vhudipfi ha murendi?

(2)

4.5 Ni a ima na na zwine murendi a amba zwone kha tshitanza/ndima ya 7?

Tikedzani phindulo yanu nga mbuno MBILI.

(2)

[10]

NA

VHURENDI VHU SONGO RANDELWAHO/VHONWAHO (MBUDZISO YA KHOMBEKHOMBE)

MBUDZISO YA 5: VHURENDI – MBUDZISO PFUFHI

Vhalani tshirendo itshi nga vhuronwane uri ni ḫdo kona u fhindula mbudziso dici tevhelaho.

NWANANGA – S Muremela

- 1 Ndo disola nda ḫdisasalandza
- 2 Nge fhano shangoni nda u ḫdisa
- 3 Ndi sa ḫdivhi tshiphiri tsha tsiko yau
- 4 Uri ndi tsiko-đifhedzi i si na dakalo
- 5 Ndo u ḫdisa fhano shangoni
- 6 Ndi tshi ri dakalo kha nne li ḫdo anza
- 7 Ndo zwi vhona zwi khagala vhukuma
- 8 Uri dakalo afho a lo ngo vhuthana
- 9 Ndo zwi ḫdivha nda zwi pfectesa
- 10 Uri na kha iwe dakalo a liho
- 11 Ndo pfa lutshemo lwau ngomu nduni
- 12 Nda nwethuwa, nda takala
- 13 Matsina ndi dakalo-zwaļo li sa angalali
- 14 Dakalo-vhukuma matsina a li athu u bebwa.

5.1 Tshirendo itshi ndi tsha lushaka-de?

Tikedzani phindulo yanu. (2)

5.2 Ndi ifhio thodea/thekiniki/thikho ya vhurendi yo shumiswaho kha mutaladzi/vese ya 12?

Tikedzani phindulo yanu. (2)

5.3 Ndi ufhio muhumbulo muhulwane une murendi a tama u u bveledza nga tshirendo itshi? (2)

5.4 Mutevhetsindo wa itshi tshirendo u dzumbulula hani vhudipfi ha murendi?

Tikedzani phindulo yanu. (2)

5.5 Ni a ima na na kuhumbulele kwa murendi ku re tshirendoni itshi?

Tikedzani phindulo yanu. (2)
[10]

THANGANYELO YA KHETHEKANYO YA A: 30

KHETHEKANYO YA B: NGANEA/FOLUKUŁOO

Fhindulani mbudziso NTHIHI i bvaho kha nganea kana folukuloo ye na guda FHEDZI.

NGANEA***NANDI NDI SHENGA? – NE Sigogo***

Fhindulani MBUDZISO YA 6 (mbudziso ndapfu) KANA MBUDZISO YA 7 (mbudziso pfufhi).

MBUDZISO YA 6: *NANDI NDI SHENGA? – MBUDZISO NDAPFU*

Bugu ya nganea i nyanyula nga u lunzhedzana zwavhuđi ha zwiwo u bva mathomoni a bugu u swika magumoni.

Nga fhungo ili lo kumedzwaho, sengulusani nyito i takuwaho sa tshiniwe tsha zwipida zwa puloto buguni iyi.

Vhulapfu ha maanea aňu vhu vhe u bva kha maipfi a 400 u ya kha a 450.

[25]

MBUDZISO YA 7: *NANDI NDI SHENGA? – MBUDZISO PFUFHI*

Vhalani tshipida tsha mafhungo tshi bvaho buguni iyi uri ni do kona u fhindula mbudziso dzi no tshi tevhela.

TSHIBVELEDZWA TSHA A

Vho Luvhani vhone vho pfa vho takala vhukuma uri khamusi dunzi la u beba niwana a re na lino li do fhufha vha vho ditshimbilela hothe vho vhofholowa. Zwo vha zwi tshi vho tou vha dina vhukuma ngauri na vha na vhavho zwo vha zwi tshi vho dzhenelela kha magudele avho tshikoloni. Zwine zwa vho tou vha dina tshothe ndi zwa musi zwi tshi vho kwama na vhushaka havho na mukalaha wavho. Musi vho no 5 dzhenela uyu mułangano, vho do da vha vhudza mukalaha wavho.

'Luvhani, Luvhani,' ndi Vho Madilaga.

'Aa!'

'Ni a divha inwi ni vho didzhia e inwi munna wa fhano mudini? Hm!'

'A, a! Nda didzhia ndi munna wa fhano nga lifhio?' Vha amba vho fara na mulomo. 10

'Ndi amba ngauri inwi ni vho zwi kona u tou amba nga ha nwananga na vhatu vha nnda nne ndi tshi vho tou nga a thi wa fhano mudini. Ndi tshi ri ndi niwana wanu, ni a rura mulomo hone zwiito zwańu zwi sumba e niwana wanu. Ni nnditshe ni songo mmbudza maloto aňu.'

'Mukalaha wanga, n̄ne ndi khou livhuha vhone vhane vha khou zwi kona u vhala zwiito zwanga. N̄nevho na n̄ne mathina ndi khou vhala zwavho zwiito. Vhone zwauri vho tou diimela hangei kule sa muṭaleli vhone vha ri n̄ne a thi zwi vhon? Vhone ndi tshi kolelwa, ndi tshi ri vhana v̄ha a kolelwa, nthā ha zwoṭhe ndi tshi ri na ḥwana wanga u a kolelwa, vhone vha ri a tho ngo vha thetshelesa ngazwo ndo beba hoyu ḥwana. N̄ne ndo zwi tanganedza uri ngoho o beba hooyo ḥwana ane 15 vhone vha mu vhona sa samba ndi n̄ne. Zwenezwo na thuso u do ḫodelwa nga n̄ne. Vhone vha do beba vhavho vhavhudī, vha khou ri a thi zwi ḫivhi zwauri vhone hūne vha khou tshimbila hone vha khou tshimbila nga n̄ne na ḥwana wanga? Kha vha nnditshe ndi thusiwe nga vhatsinda. Nda sa ralo ndi do dzula ndo ḫungufhala mma! Nda fa nga mbilu nda sia onoyo ḥwana wanga a si na mukoma.' 20
Tsemano heyi yo do fhumula musi hu tshi dzhena Vho Muvhi khaladzi a Vho Luvhani. Vho Muvhi vha khou da u pfesesa nga ha muṭangano saizwi vho rambiwa. Vho do ri vho no swielelwa vha amba zwe vha ḫela zwone.

'N̄ne ndo da u pfesesa nga ha muṭangano hoyu we nda rambiwa nga vha siviki ya fhano, ndi khou ri inwi khaladzi ni khou pfa no vhofholowa naa u ita zwenezwi two 30 ambwaho?'

'Nwana wa mme anga, ndi fhano ndo no neta. Ndo no neta nga u vha muthu o tshinyaho ngeno tshe nda tshinya tshi sa vhonali.'

[Ndima ya 6]

7.1 Ndi tshipida tshifhio tsha puloto tshi ḫanwaho nga mafhungo aya?

Tikedzani phindulo yanu. (2)

7.2 Vho Madilaga vha bveledzwa sa muthu-de mafhungoni e na vhala afho nthā? (2)

7.3 Ndi lushaka lufhio lwa khudano lu sumbedzwaho mafhungoni a re afho nthā?

Tikedzani phindulo yanu. (2)

7.4 Siangane na fhethuvhupo zwi ḫutuwedza hani Vho Madilaga uri vha vhone Vho Luvhani vha songo tea u dzhia tsheo malugana na ḥwana Tshifhiwa ngeno vha songo ranga vha vha kwama sa khotsi awe? (2)

7.5 Mafhungo aya e na vhala afho nthā a thusedza hani u anetshela zwa phanda? (2)

- 7.6 Ndi afhio masiandaitwa o bveledzwaho nga u bebwa ha Tshifhiwa e na $\hat{\text{lin}}\hat{\text{o}}$ zwi kwamaho vhutshilo ha Vho Luvhani na vhana vhavho? Khwathisedzani nga mbuno THARU. (3)
- 7.7 Ndi ifhio ndivho ine muñwali a tama u i bveledza kha vhavhali nga u bebwa ha Tshifhiwa e na $\hat{\text{lin}}\hat{\text{o}}$ $\hat{\text{lithihi}}$? (2)
- 7.8 Sumbedzani uri munyanya wa u pembelela u fhedza pfunzo ha Tshifhiwa zwi thusedza hani u tandulula thaidzo ine Vho Luvhani vha vha nayo buguni iyi.
- Tikedzani phindulo yañu. (3)
- 7.9 Ndi ufhio muhumbulo muhulwane une muñwali a $\hat{\text{toda}}$ u u bveledza nga mafhungo a bugu iyi? (2)
- 7.10 U ya nga kuhumbulele kwañu ni vhona zwe Vho Luvhani vha $\hat{\text{tutshela}}$ muñi wavho vha ya vha dzula Polokwane na ñwana wavho Tshifhiwa zwo tea naa?
- Tikedzani phindulo yañu. (2)
- 7.11 No vha ni tshi nga ita mini arali hu inwi Vho Madilaga vhe vha wana ñanga na muhura wañu vha tshi khou shela mushonga khoroni ya muñi wañu?
- Khwathisedzani kuhumbulele kwañu nga mbuno THARU. (3)

[25]

ISHA LA MITODZI – NE Phaswana

Fhindulani MBUDZISO YA 8 (mbudziso ndapfu) KANA MBUDZISO YA 9 (mbudziso pfufhi).

MBUDZISO YA 8: *ISHA LA MITODZI – MBUDZISO NDAPFU*

Bugu ya nganea i nyanyula nga u lunzhedzana zwavhuđi ha zwiwo u bva mathomoni u swika magumoni a bugu.

Nga fhungo ili lo kumedzwaho, sengulusani nyito i takuwaho sa tshiñwe tsha zwipiđa zwa puloto buguni iyi.

Vhulapfu ha maanea aňu vhu vhe u bva kha maipfi a 400 u ya kha a 450.

[25]

MBUDZISO YA 9: *ISHA LA MITODZI – MBUDZISO PFUFHI*

Vhalani tshipiđa tshi tevhelaho tsho bviswaho buguni iyi uri ni do kona u fhindula mbudziso dzi no tshi tevhela.

TSHIBVELEDZWA TSHA B

Muniwe na muňwe we a vha e hafho muđini, ndi amba wa lushaka lwa Tshipate, o mbo di zwi vhona na zwenezwo zwauri munyanya hoyu u do vha muhulu.

'Murathu, Vho-Loshani vha khou ḥoda mini kha zwa Tshipate? Vha bviseni mani havhaļa muhulwane vha do ri poilela munyanya ...' Musi mukomana wa ene Aifheli, Thathani a sa athu fhedza u amba, o mbo di dzhenwa haňwani nga muzwala wawe. 5

'Ndo vha ndi tshi khou ri mini henefha Vho-Dafitha; a tho ngo ri u la munna nga a bve? Zwino khezwi vhokhotsimuhulu vha tshi khou li amba. Hone u dzhena ngafhi hafha kha zwa vhana vha malume anga? Ndi mutsinda ane a khou da u ri remissa dzithoho.'

Aifheli ndi ene we a tou fa u dzimela haya mafhungo. Muniwe na muňwe o vha a sa ḥodi u pfa nga ha havha Vho-Loshani. Aifheli o do bula zwauri u vhona vhe vhone muthu vhane vha nga thusa kha u ita uri munyanya wawe u tshimbile. Naho Aifheli a songo vhuzzisa mashaka awe uri ndi ngani vha tshi vhona Vho-Loshani vha songo tea u vha kha munyanya wawe, o di sala e na mbudziso i si na phindulo. O sokou ḥirindidza nga le Vho-Loshani vha mu eletshedza khaļo la uri muthu ha tevheli zwitshele. Ene o vha o zwi vhona zwauri arali a vhudzise vhathu vha hawe uri ndi ngani vha sa ḥodi Vho-Loshani, a nga pfa mafhungo manzhi. 10 15

Aifheli o mbo di onesa mashaka awe a amba zwauri samusi matshelo o tea u tou vhusiku sala nduni, u do fanela u isa marambo maiweni hu tshi kha di vha na tshifhinga.

20

Lo ri li tshi sala li tshi ri mbala, ha vha hu uri na Aifheli u vhonala a tshi khou di monamona saizwi lwendo lu lulapfu. Itali modoro wo dzula u tshi khou bvuma uri u dudele. O ri u fhedza u gama a mbo di bva; a dzhena modoroni wawe, a livha ha ene Maria.

Maria o wanala o no di didoswola kale. Hezwi two ita uri vha mbo di dzhena ndilani 25 hu si na u lenga. Samusi vho buba vho rali, vha do swika hu tshi kha di tou vha na tshifhinga tshavhu di tsha u renga. U tangana Maria ndi muthu wa u difuna, duvha heli khae li tou vha la nthia vhukuma. Zwi tshi da zwiambaroni, Maria u nga si mu fushe. Nahone duvha le Aifheli a ri u khou tama u ya ngei Pietersburg nae u renga zwiambaro, ndevhe dza Maria dzo vhonala dici tshi tshina-tshina; ndi ri Maria ha 30 funi zwiambaro u shela ndala.

[Ndima ya 3]

- 9.1 Ndi tshipida tshifhio tsha puloto tshi tanwaho nga mafhungo aya? (2)
Tikedzani phindulo yanu.
- 9.2 Aifheli u bveledzwa sa muthu-de afho mafhungoni e na vhala afho nthia? (2)
- 9.3 Ndi lushaka lufhio lwa khudano lu sumbedzwaho mafhungoni a re afho nthia? (2)
Tikedzani phindulo yanu.
- 9.4 Siangane na fhethuvhupo zwi tutuwedza hani Vho-Dafitha na Thathani uri vha hane Vho Loshani vha tshi dzhenelela kha mafhungo a munyanya wa Aifheli? (2)
- 9.5 Mafhungo aya e na vhala afho nthia a thusedza hani u anetshela zwa phanda? (2)
- 9.6 Ndi afhio masiandaitwa o bveledzwaho nga u funana ha Vho-Loshani na Maria buguni iyi? Khwathisedzani nga mbuno THARU. (3)
- 9.7 Ndi ifhio ndivho ine muhwali a tama u i bveledza kha vhavhali nga u bebwa ha Rotondwa a tshi tou fana na Vho-Loshani nga mbumbo na lukanda? (2)
- 9.8 Sumbedzani uri u khakhisana ha Rotondwa na Musatondwa zwi thusedza hani u tandulula thaidzo ye Aifheli a vha e nayo buguni iyi. (3)
- 9.9 Ndi ufhio muhumbulo muhulwane une muhwali a toda u u bveledza nga mafhungo a bugu iyi? (2)

9.10 U ya nga kuhumbulele kwaṇu ni vhona zwe Vho-Loshani na Maria vha vha vha sa tikedzi u malana ha Rotondwa na Musatondwa zwe tea naa?

Tikedzani phindulo yaṇu.

(2)

9.11 No vha ni tshi nga ita mini arali hu inwi Vho-Josephine vhe vha wanulusa uri munna wavho Vho-Loshani vha funana na Maria?

Khwathisedzani kuhumbulele kwaṇu nga mbuno THARU.

(3)

[25]

KANA

FOLUKUŁOO

KHUVHANGANYO YA FOLUKUŁOO – RV Tshikovhi

Fhindulani MBUDZISO YA 10 (mbudziso ndapfu) KANA MBUDZISO YA 11 (mbudziso pfufhi).

MBUDZISO YA 10: *KHUVHANGANYO YA FOLUKUŁOO – MBUDZISO NDAPFU*

Maṇwalwa a sialala a takadza na u tevhelelea musi o anetshelwa zwavhudī hune ra wana zwiwo zwe farana zwi tshi tikedza na u ḥotomodza muhumbulō muthihi muhulwane.

No disendeka nga zwibveledzwa zwa sialala zwi tevhelaho, sengulusani ndila ine muṇwali a bveledza ngayo puloto yazwo.

TSHIBVELEDZWA TSHA C

LUNGANO

'Kudele kwa lufu'

NA

TSHIBVELEDZWA TSHA D

TSHIKHODO

'Vhatavhatsindi vha Thengwe'

Vhulapfu ha maanea aṇu vhu vhe u bva kha maipfi a 400 u ya kha a 450.

[25]

MBUDZISO YA 11: KHUVHANGANYO YA FOLUKUŁOO – MBUDZISO PFUFHI

Vhalani mafhundo a tevhelaho uri ni ḋo kona u fhindula mbudziso.

TSHIBVELEDZWA TSHA E

MBILA YO KUNDWA MUTSHILA NGA U RUMELA – RV Tshikovhi

Salungano! Salungano!

Hu pfi phukha dzothe dzo vha dzi si na mitshila.

Hezwi two dina ngauri dzo vha dzi sa koni u pandela thunzi musi dzi na zwilonda. Hu pfi gwavhavha na mbila ndi musi zwi madelemapfani; zwi tshi somolana zwa hanwani. Thama idzi dzothe dzo vha dzi tshi dzula fhasi ha matombo. Linwe duvha dza langana uri kha ri tou ita madiso a u ya u ḋoda zwiliwa. Ha tendelaniwa uri hu do thoma mbila nga lenelo li tevhelaho.

Hu pfi nga duvha li tevhelaho mbila ya vuwa i tshi khou dzida i tshi ri khuvha a thi pfiwi; ndi a lovha. Ya humbelo khonani yayo gwavhavha uri kha i ye u tunda. Hu pfi musi gwavhavha o ya u tunda ndi musi mbila i tshi bva ya ora duvha i tshi khou dibatela na mabuvhi i tshi endela u la. Gwavhavha naho mafhundo aya lo a pfa a lo ngo ri tshithu ngao.

Hu pfi linwe duvha ha rambiwa tshivhidzo tshi si na tsaleli. Phukha dzothe dza khunyelela musanda nga nnnda ha vhombila vha no didivha uri vha na muimeleli. Ngei musanda ho dzinginywa la uri vhunga phukha dzi tshi khou lila nga u shaya mitshila na u ralo u tambula nga magufha, ndi khwiñe hu wanale phukha ine ya ḋo thusa kha u bvisa magufha kha phukha dzothe; hu si na tshikhetho na vhukolikoli.

Randevhe a vhudzisa uri arali iyo phukha ya vhonala i tshi khou shuma i si na tshikhetho na vhukolikoli i ḋo livhuwiwa nga mini?

Phindulo ya vhuya i tshi ri phukha yeneyo ya u shaya tshikhetho na vhukolikoli i ḋo dzhia wonoyo mushumo wa u lisa na u bvisa magufha na musi phukha dzo no wana mitshila. Hone i songo lavhelela u gonya ha mbuelo vhunga mushumo u wayo.

Musanda vho zwa la uri phukha i no ḋoda i fanela u vha i na vhudele nahone i si na magufha. I vhe i na muvhala u vhonalaho nahone u fanaho na wa lushaka lwa hayo.

Zwo dzhiela phukha nnzhi tshifhinga u divha uri phukha iyo i nga vha i ifhio. Musi dzi kha di vha dzo hanganea ngauralo Randevhe a tuwa o tou livha mutshena a ri:

'Takuwani ni dzhie mushumo wanu ni litshe u tolou ri vhulahisa ndala.' Randevhe o mbo di newa vhukoma zwenezwo ha pfi u divha vhalanda vhawé. Matshena ndi tshinoni tshitshena tshi no tshimbila na kholomo tshi tshi bvisa magufha. Dzi sa athu u balangana dzo vhudzwa u pfi dzi vhuye musanda nga vhege i tevhelaho mitshila i ḋo vha yo vhuya nga mirole. Musi dzo lindela mitshila yadzo matshena o vha a tshi khou ita mushumo wawe a si na tshikhetho na vhukolikoli. Muthada yo sala i tshi khou ora duvha ngeno i tshi khou komolela u vhuya ha gwavhavha.

Gwavhvahva a tshi pfala a tshi khou onesana na vhaiwe mushondwana ya mbo di sunguvhe fhasi ha tombo. Ula a tshi tou dzhena mbila ya mu sedza nga ma^{to} a ndala ene a nga ha zwi vhoni zwauri o sedziwa. Mbila yo bva na u kondelela ya vhuya ya bva ya bata mabuvhi mararu.

Nga vhege i tevhelaho gwavhvahva a talutshedza mbila uri hu pfi nga duvha li tevhelaho muⁿⁱwe na muⁿⁱwe a de a dz^hie mutshila wawe musanda. Vhusiku uho mbila yo ri u dzida ya nga i sa balea khana. Nga matsheloni a li tevhelaho gwavhvahva a difhumulela a tshi ya guvhanganoni. Henengei ya phakhwa yo phakhwa mitshila nga dziphukha na gwavhvahva a nanga wawe. Musi phukha dzo no tangana gwavhvahva a sokou doba kwonokwo kubunuphunu a farela thama. A tshi i nea ya vhona ku kutuku ya gungula ya ri: 'No nndela na kutshila ku sa divhalei inwi no ambara une na do tou vhanda ngawo. Na riⁿe mitshila yavhu^di milapfu ri a i funa!'

Gwavhvahva la tuwa li tshi khou tonga na u sea li tshi ri: 'Wo kundwa mutshila nga u rumela khonani!'

Ha vha hone u fa ha lungano!

[Masi^atari a 113–114]

- 11.1 Maipfi, 'Salungano! Salungano!', a wanalaho kha mutualadzi wa 1 ndi a ndeme. Sumbedzani uri a wela kha tshipida tshifhio tsha puloto, ni dovhe ni sumbedze na ndeme yao. (2)
- 11.2 Muanetsheli u tana hani mvumbo ya gwavhvahva mafhungoni aya e na vhala? (2)
- 11.3 U ya nga ha lungano ulwu ndi afhio masiandaitwa a si avhudi o vhangwaho nga kutshilele kwa vhombila? (2)
- 11.4 Fhedzisani murero u tevhelaho: 'Mbila yo kundwa ...' (2)
- 11.5 Muhumbulo muhulwane wa lungano ulwu ndi ufhio? (2)
- 11.6 Ndi ifhio ndivho ya muⁿwali ya u shumisa vhogwavhvahva sa mubvumbedzwa lunganoni ulwu? (2)
- 11.7 Bulani ZWIRARU zwe na vha ni tshi do ita arali no vha ni na khonani i no fana na vhombila u shandukisa kutshilele kwavho kwa vhubva. (3)

NA

TSHIBVELEDZWA TSHA F: VHURENDI HA SIALALA (TSHIKHODO)

**TSHIKHODO TSHA THOVHELE VHO RATSHIMPHI PHIRIPHIRI
TSHIVHAŠE – VR Tshikovhi**

- 1 Ndi nne Phiriphiri Tshivhase
- 2 Muri wa u vhavha
- 3 Ndi a vhavha sa phiriphiri
- 4 A thi liwi.

- 5 Ndi muri wa makhuwa
- 6 Tshivhasa-midi-ya-vhaiwe
- 7 Wanga wa sala wo tshena
- 8 Wa ha Mankili Mankili!

- 9 Ndi Ramarumo maguvho a Nwali!
- 10 Ene a halifhaho e thovhoni!
- 11 Ene mulwa o furalela muataha!
- 12 Tshivhase-midi-ya vhathe ... ahee!

[Siatari la 121]

- 11.8 Murendi u todou bvisela khagala zwifhio nga mataladzi/vese ya 2? (2)
 - 11.9 Sedzulusani mataladzi/vese ya 8, hu na ndovhololo ya ipfi 'Mankili'. Sumbedzani ndeme ya ndovhololo iyo. (2)
 - 11.10 Bviselani khagala mushumo wa tshiga tsha u vhala tsho shumiswaho kha mataladzi/vese dza 9–12. (2)
 - 11.11 Mutualadzi/Vese ya 11 i ni disela tshifanyiso-de muhumbuloni no sedza tshikhodo tshothe nga u angaredza? (2)
 - 11.12 Sedzulusani mataladzi/vese dza 6–7, u ya nga kuvhonele kwañu ndi zwifhio zwine ni nga sasaladza no sedza matshilisano? (2)
- [25]

THANGANYELO YA KHETHEKANYO YA B:

25

KHETHEKANYO YA C: DIRAMA

Fhindulani mbudziso NTHIHI i bvaho kha dirama ye na guda FHEDZI.

ULEMA HU FHIRA U LOTSHELWA – IP Demana

Fhindulani MBUDZISO YA 12 (mbudziso ndapfu) KANA MBUDZISO YA 13 (mbudziso pfufhi).

MBUDZISO YA 12: *ULEMA HU FHIRA U LOTSHELWA – MBUDZISO NDAPFU*

Arali khudano ya sa bveledzwa zwavhudi kha bugu ya dirama, zwi thithisa muhumbulo muhulwane wa dirama na u xedza vhavhali.

No ditika nga izwo two bulwaho afho ntha, sengulusani ni tshi sumbedza uri muñwali u zwi kona hani u shumisa khudano u bveledza muhumbulo muhulwane diramani iyi.

Vhulapfu ha maanea anu vhu vhe u bva kha maipfi a 400 u ya kha a 450.

[25]

MBUDZISO YA 13: *ULEMA HU FHIRA U LOTSHELWA – MBUDZISO PFUFHI***TSHIBVELEDZWA TSHA G**

VHO-MARITA:	Izwo a vha koni u vhudzisa nne lini. Hufha ene muñe a tshi do vhuya? U do vha talutshedza hune a bva hone. Hone-vho u hanya ndi u vhona. (<i>Vha a sea</i>)	5
VHO-NEFEFE:	(<i>Vho no sinyuwa</i>) Ni nga ni vho todou fhambana na muya wanga hezwino. Hu khou seisa mini kha zwine nda khou amba? Ni fanela u kala maipfi anu musi ni tshi khou amba na nne. Tshifhinga tshothe ndi tshi ri ndi fha, inwi ni wa u thutha. (<i>Vha lidza tsaiwa</i>) a thi divhi uri ni khou ri ndi ite mini lini.	10
VHO-MARITA:	Kha vha ite tshiniwe na tshiniwe tshine vha funa khotsi a Mashudu. Nne a thi divhi uri ndi nga ita mini tshine tshi nga vha takadza lini.	15
VHO-NEFEFE:	Hezwi u tshi vhona ndo u vhidza na mme hafhano iwe Khwathisani, ndi nwambo wa haala mafhungo a mulovha. Khamusi arali ri tshi khou tou ambä zwavhuđi ro dzula ri nga wana ndila ya u thasulula thaidzo hei, kani-ha ndi khou khakha Marića. Ndi ralo ngauri itali u khakha hu sa pfali. (<i>Vho-Nefefe vha ralo vhe nwethu</i>)	20
VHO-MARITA:	A vha khou khakha lini, fhedzi zwe vha rwisa zwone nwana mulovha a two ngo ntakadza lini. Nwana wa musidzana ha fani na wa mutukana Vho-Nefefe. U tana a na mazwimbisa nwanganja, ngoho ndi tshi khou amba zwino o zwimba o tou vhi! Ndi amba na u vuwa ha koni lini nwana.	

VHO-NEFEFE:	(<i>Vha tshi sumba u vhaisala</i>) Zwauri ndo mu rwa nda ṭodou fhira ho teaho ndo zwi vhona. Ndi uri ndo ṭavhanya u dalelwā. Fhedzi-ha arali o vhaisala lwo kalulaho ndi ḍo vhona uri ndi nga bva hani. Tshine na funa u tshi sedzesesa Mariṭa ndi tsha uri የwana hoyu ni khou mu litshedzela. Ni nga vha ni sa khou zwi vhona uri a ni khou mu ṭahulela lini. Arali nda ri ni khou mu dzhenisela vhuri ndi nga vha ndi sa khakhi lini. Nga u vhona hanga u vho tou ḫilanga hoyu የwana wanu.	25
VHO-MARIṬA:	Vhone khotsi a Mashudu-ii, nne a thi ḫivhi uri vha khou ri ndi iteni lini? Hoyu Mashudu vhone vha tou nga a vha mu funi lini. Ndi amba ngauri a tou vhuya a tou kuthu kuṭukuku ṭeḍu, ndi luula. Uyu wa mutukana u khou vhuya a ita mini? Madzuloni a uri a thuse afha museni wa maluvha, hai, ene tshawe ndi u vhala fhedzi kana u ṭanzwa goloi. Ho vha hu songo vhuya ha fanela hu na mutukana a no shuma museni wa maluvha hafhano. Fhedzi ngauri o swikela, hai, tshiñwe na tshiñwe tshine a ita tsho luga. A thi mu soli ndi የwananga khoyu. Vha amba u kala khaladzi, afho o phasa. Naho muñwe a tshi nga ndi muṭuku vha a lingana havha vhana. Hafhu vha songo siana nga makole a no swika mavhili.	30 35 40

[Luta 1 Bono I]

- 13.1 Ndi zwifhio zwine zwa khou ita uri hu vhe na khudano vhukati ha Vho-Nefefe na Vho-Mariṭa mafhungoni e na vhala afho n̄tha? (2)
- 13.2 Mafhundo e na ḫewa afho n̄tha a ḫana tshipida tshifhio tsha puloto? Khwathisedzani phindulo yañu nga mafhundo a pfalaho. (2)
- 13.3 U ya nga mafhundo e na vhala afho n̄tha ni vhona Vho-Mariṭa vho olwa sa muthu-đe? (2)
- 13.4 Nyambedzano vhukati ha Vho-Nefefe na Vho-Maria mafhungoni e na vhala i na vhutumani-đe na zwine zwa khou bvelela musi ḫirama i tshi fhela? (2)
- 13.5 Ndi mudzedze ufhio wa tshifhinga u bvukululwaho nga mafhundo e na vhala?
- Tikedzani phindulo yañu. (2)
- 13.6 Ndi ufhio muhumbulo muhulwane une muiwali a tama u u ḫanela vhavhali diramani iyī? (2)

- 13.7 Lavhelesani mutualadzi wa 23: (*Vha tshi sumba u vhaisala.*) Talutshedzani uri ndi ngani muanetsheli a tshi shumisa ndango ya tshiteidzhi nga ndila heyi. (2)
- 13.8 Talutshedzani masiandaitwa MARARU a vhangwaho nga u hana ha Mashudu ngeletshedzo mbuya ye khotsi awe Vho-Nefefe na khaladzi awe Khwathisani vha mu fha yone.
- Tikedzani phindulo yanu nga mbuno THARU. (3)
- 13.9 No sedza mashungo a ino dirama yothe nga u angaredza, kutshilele kwa Vho-Marīta ku fhambana hani na kwa Vho-Nefefe? Khwathisedzani phindulo yanu nga mbuno THARU dici pfalaho. (3)
- 13.10 Ni nga itani arali na diwana ni kha nyimele ine Mashudu a diwana e khayo musi vhabebi vhaweha sa tendelani zwi tshi da kha ndila ine vha tea u mu alusa ngayo? Khwathisani muhumbulo wanu nga mbuno THARU. (3)
- 13.11 Ni a tendelana na na zwine Mashudu a ita musi a tshi sema mme awe nge vha hana musi a tshi tuwa na Tsawani tshikhuwani?
- Tikedzani muhumbulo wanu nga mbuno MBILI. (2)
[25]

TSHILWAVHUSIKU – TT Mudau

Fhindulani MBUDZISO YA 14 (mbudziso ndapfu) KANA MBUDZISO YA 15 (mbudziso pfufhi).

MBUDZISO YA 14: TSHILWAVHUSIKU – MBUDZISO NDAPFU

Arali khudano ya sa bveledzwa zwavhudi kha bugu ya dirama, zwi thithisa muhumbulo muhulwane wa dirama na u xedza vhavhali.

No ditika nga izwo two bulwaho afho nthā, sengulusani ni tshi sumbedza uri munwali u zwi kona hani u shumisa khuḍano u bveledza muhumbulo muhulwane diramani iyi.

Vhulapfu ha maanea aṇu vhu vhe u bva kha maipfi a 400 u ya kha a 450.

[25]

MBUDZISO YA 15: TSHILWAVHUSIKU – MBUDZISO PFUFHI

Vhalani tshipida tshi tevhelaho tsho bviswaho buguni iyi uri ni do kona u fhindula mbudziso dzo disendekaho khatsho.

TSHIBVELEDZWA TSHA H

MUKOMA:	(<i>U ḥavha mukosi.</i>) Vhoinwi vhathu, ro ruiwa kha vhoiwe nga khosi yashu. Naa khezwi ni sa bveli dzwaini ra livhana zwifhatuwo?
OUBAAS PIET:	(<i>Hu dzhena Oubaas Piet na Luka na vhaiwe maforotereke.</i>)
MUKOMA:	(<i>Vho angaladza tshigidi.</i>) Ni ḥoda'ni? Ni na nndwa naa? Khosi yashu i ri hani hani ri tshi nga rengisela vhafhiri vha gondo shango naa? Khosi yashu i ri i a vha pfela vhutungu ngauri u renga havho mavu hu do vha u dilodzwa vhunga sa izwi mbamatshelo dzi tshi do dala matemba. Thovhele u ri; naa vhathu ri onesana lini?
LUKA:	(<i>U amba nga khani na swili.</i>) Riñe a ri tuwi, tsilu ndiwe! Ri fhirela phanda ri tshi ya ngafhi? A u zwi divhi uri mathina ili shango ndi la Mudzimu, ndi lashu rothe. Divha hezwi; khosi yau ndi tsilu; nahone a i ri tshu'si.
MUKOMA:	Khosi i ri ḥuwani ni ri sendelele vhudzulo zwino!
OUNBAAS PIET:	(<i>Vha thuntsha tshikhalani.</i>) U kha di vha wo ima, gidima ndi sa athu u davhalasa.
	(<i>Mukoma na vhaiwe vha tou dibeba. Vha a bva.</i>)
	(<i>Musanda Swongozwi. Hu vhonala Thovhele Tshilwavhusiku o thithisea muyani.</i>)

VHO	(<i>U amba e ethe.</i>) U hanya ndi u vhona madzanga.	
TSHILWAVHUSIKU:	Ngavhe vhadzimu vha tshi nga zwi kona vha nea vha ^{do} uhulu vhanga dzunde line ngalo, thumbu matshelo vha do fusha; u bva afho ndi kone u phetha ndaela ye vhokhotsi anga vha nnyetulela yone. Ndi koneha u tangana na madi a Litshovhu, ndi vhe madi, ndi elele u guma thanganyoni yawo na mulambo wa Thuvhalalwe.	25
	Ndi elele ndi gume tshisimani tshawo Phawe.	30
	Kana ndi shanduke thavha ndi pfi Swongozwi,	
	Ndi pfi La ndou,	
	Ndi pfi Marengwa kana Magoni yo dzibaho.	
	(<i>Hu dzhena Mukoma, vhadinda na vhaniwe. Vha dala fhasi phanda ha khosi.</i>)	35
MUKOMA:	(<i>O dala fhasi.</i>) Mune wa vhothe mune wa shango Ravhuhali! Maila u sumbwa! Tshidada! Dambatshekwa li na segere! Mavu! Kholomo! Thindi ndi a midza Muhali ndi kundwa nga shambo!	
VHO	Khezwi ni tshi tou nga no tanganya ma ^{to} na ndau. Ho	40
TSHILWAVHUSIKU:	pwashea 'ni?	
MUKOMA:	Ndau a hu na mu ^{ne} wanga. Ndi, ndi, ndi ..., hu tou nga ..., ha, Muhali, ha, Muhali.	
VHO	Ni songo fhirelelwa nga mare ni tshi amba. Muhali nazwino ndi nne uno. Bulani mukoma wanga ndevhe	45
TSHILWAVHUSIKU:	dzanga dzo lindela mutevhetsindo wa ipfi lanu.	
MUKOMA:	Khakhameda! Mu ^{ne} wa vhothe! Gulu mune wanga. Yo ponyokisa muya wanga. A thi divhi uri ndo ponya nga ndila-de. Muhali vho vha vha do tou kumba zwitumbu fhedzi. Hu tou nga ndo tshinya nge nda sa bve na tshi ^{tangu} na pfumo langa. Thundu yo vha i tshi do nn ^d ivha Muhali. Mboloma!	50
VHO	(<i>U fara Mukoma tshanda.</i>) Takuwa' i nazwino u yo tutula pfumo lau; tsilu ndiwe! Ni matsilu nothe. Mmbudzeni; vha ri mini matarelwa-madyavathu?	55
TSHILWAVHUSIKU:	Zwivhungu zwenezwi!	

[Luta III Bono IV na V]

- 15.1 Ndi zwifhio zwine zwa khou ita uri hu vhe na khudano vhukati ha maforotereke na vhadzulapo vha Swongozwi mafhungoni e na vhala afho nth^a? (2)
- 15.2 Mafhungo e na newa afho nth^a a tana tshipida tshifhio tsha puloto? Khwathisedzani phindulo yanu nga mafhungo a pfalaho. (2)

- 15.3 U ya nga mafhungo e na vhala afho nthā ni vhona Mukoma o olwa sa muthu-de? (2)
- 15.4 Nyambedzano vhukati ha Mukoma na maforotereke mafhungoni e na vhala a na vhutumani-de na zwine zwa bvelela musi dirama i tshi fhela? (2)
- 15.5 Ndi mudzedze ufhio wa tshifhinga u bvukululwaho nga mafhungo e na vhala? Tikedzani phindulo yanu. (2)
- 15.6 Ndi ufhio muhumbulo muhulwane une muriwali a tama u u tanela vhavhali diramani iyi? (2)
- 15.7 Lavhelesani mutualadzi wa 6: (*Vho angaladza tshigidi.*) Talutshedzani uri ndi ngani muanetsheli a tshi shumisa ndango ya tshiteidzhi nga ndila heyi. (2)
- 15.8 Talutshedzani masiandaitwa MARARU a vhangwaho nga musi Tshilwavhusiku a tshi swielela mavhuru shangoni lawe. (3)
- 15.9 No sedza mafhungo a ino dirama yothe nga u angaredza, kutshilele kwa Tshilwavhusiku ku fhambana hani na kwa Luka? Khwathisedzani phindulo yanu nga mbuno THARU dzi pfalaho. (3)
- 15.10 Ni nga itani arali na diwana ni kha nyimele ine Vho Mmbangiseni vha diwana vhe khayo sa mubebi, musi vha tshi vhulahelwa riwana wavho Mphelekedzeni nga Maforotereke? Khwathisedzani muhumbulo wanu nga mbuno THARU. (3)
- 15.11 Ni a tendelana na na zwine Maforotereke vha ita musi vha tshi dzharatela na musi vha tshi hanela vhadzulapo vha tshi sera darata?
- Tikedzani muhumbulo wanu nga mbuno MBILI. (2)
[25]

**THANGANYELO YA KHETHEKANYO YA C:
MARAGAGUTE:**

25

80